

В ПОНЕДЕЛЬНИК 5-Й СЕДМИЦЫ ПО ПАСХЕ

В НЕДЕЛЮ САМАРЯНЫНИ ВЕЧЕРА,

На Господи воззвах: поставим стихов 6. Стихиры праздника, 3. Глас 5-й:

Подобен: Радуйся постником:

Явился светоявленное и красное, Спасова Воскресения днесь преполовление всесвятое, яко полудне светлое, уясняющее мир Божественными благодатьми Христова востания, осиявающее чудеса нетления, облиставает знамения, и показывает на высоту Вознесение, являет многорачительное Духа пришествие, Пятидесятницы всечестныя светлейшее торжество. Темже и подает душам нашим мир и велию милость.

Яко Божественныя славы река, празднику ныне преполовившуся, Господь струи благоутробия всем подавая, вопиет: жаждай да грядет ко Мне, и пьет тепле. Источник бо сострадания, и милости пучина Сам сый, источает мирови оставление, омывает прегрешения, и очищает недуги: спасает Воскресение Его празднующих, покрывает любовию почитающих еже со славою Вознесение Его, и подает душам нашим мир и велию милость.

Посреде святилища став, неописанный Бог же и Господь: Бог бо бже естеством, аще и нас ради вочеловечився, описан явился телом, всем источаше животочныя глаголы, всем глаголя: души очистите, и зноя страстей охладите, да не како лишатся пития человецы. Божественную бо благодать дарую, безсмертнаго и лучшаго и вышняго Царствия, сопричаститися Мне Создателю, и прославится.

И Миней, 3.

Слава, и ныне: глас 8-й:

Преполовившуся празднику, прежде страсти и славнаго Воскресения Твоего Господи, был еси уча Блаже во святилищи непокоривыя иудеи, и фарисеи, и книжники, и вопия к ним: жаждай да грядет ко Мне и пьет, веруй в Мя, воды жизни, Духа Божественнаго реки потекут от чрева его. О неизреченныя премудрости Твоего хваления! Иже вся исполняй Боже наш, слава Тебе.

На стиховне, стихиры Осмогласника, глас 4-й:

Животворящему Твоему Кресту, непрестанно кланяющеся Христе Боже, тридневное Воскресение Твое славим: тем бо обновил еси истлевшее человеческое естество Всесильне, и иже на небеса восход обновил еси нам, яко един Благ, и Человеколюбец.

Стих: К Тебе возведох очи мои:

Хотех слезами омыти моих грехов Господи, рукописание и прочее живота моего покаянием благоугодити Тебе: но враг льстит мя и борет душу мою. Господи, прежде даже до конца не погибну, спаси мя.

Стих: Помилуй нас Господи, помилуй нас:

Мученичен: Прославляйся в памятех святых Твоих Христе Боже, от них умолен бывая, низпосли нам велию милость.

Слава, и ныне: глас 6-й:

Празднику преполовившуся, Твоего Христе Воскресения, и Божественного пришествия Святаго Твоего Духа, спешдшеся чудес Твоих воспеваем таинства: вонъже низпосли нам велию милость.

По Ныне отпускаеши: и по Отче наш:

Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жагдай да грядет ко Мне и да пьет. * Источниче жизни нашея, Христе Боже, слава Тебе.

[Слава: святого, аще имать. И ныне: празднику]

Ектения, и отпуст.

В ПОНЕДЕЛЬНИК 5-Й СЕДМИЦЫ ПО ПАСХЕ

НА УТРЕНИ,

На Бог Господь: тропарь праздника глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе. [Трижды]

По 1-м стихословии, седален, глас 4-й:

Возревша на гробный вход, и пламене ангельскаго не терпяща мироносицы, с трепетом дивляхуся, глаголюща: егда украдеса отверзый разбойнику рай? еда ли воста, Иже и прежде страсти проповедавый востание? Воистинну воскресе Христос, сущим во аде подая живот, и воскресение.

Стих: Господи, да не яростию Твоею обличиши мене, ниже гневом Твоим накажеша мене.

Смиренную душу мою посети Господи, во гресех житие все иждившую, и якоже блудницу приими мя Спасе, и спаси мя.

Стих: Дивен Бог во святых Своих, Бог Израилев.

Мученичен: Днесь ангельская воинства, в память страстотерпцев приидоша, верных мысли просветити, и вселенную благодатию уяснити: теми Боже, умолен бывая, даруй нам велию милость.

Слава и ныне: Богородичен:

Стена непоборимая нам христианом еси Богородице Дево: к Тебе бо прибегающе невредами пребываем, и паки согрешающе имамы Тя молитвенницу. Тем благодаряще вопием Ти: радуйся Благодатная, Господь с Тобою.

По 2-м стихословии седален, глас 8-й:

Подобен: Премудрость:

Премудрость Слово Отчее, Иже и давый апостолом глагол Божий, проповедати концем, еже на землю Его пришествие, от прелестников евреев неистовством досаждаемъ бываше, беснуяся и прелестник грозно уничижаемъ, Иже незлобиво к ним вопияше: не судите на Мя суд несудимаго беззаконнии. К Нему убо возопиим: Человеколюбче Христе Боже, прегрешений оставление низпосли, воспевающим верою безприкладную славу Твою. [Дважды.]

Воскресение Христово: псалом 50.

Канон праздника, со ирмосы на 8, и Миней на 4. Кондак, и светилен праздника.

Песнь 1.

Ирмос: Моря Чермнаго пучину, * немокрыми стопами * древле шествовав Израиль, * крестообразно Моисеовыма руками, * Амаликову силу в пустыни победил есть.

Запев: Слава Тебе Боже наш, слава Тебе

Велия яже паче ума, Твоего Владыко божественаю воплощения благодеяния сияют нам, дарове же и благодати, и божественныя светлости, благоподатно истекают.

Пришел еси Христе, светлости Божества испущая, праздника посреди явленно: праздник бо радостен спасаемым еси, и спасения нашею ходатай.

Премудрость и правда, Господи, и избавление, от Бога Ты бысть нам, и от земли к небесней приводя высоте, и Дух Божественный даруя.

Плоть Твоя ислечения во гробе не виде Владыко, яко составися кроме семене, тления не прият исследованием естества, пресуществене, не работавши.

И святого Минея на 4.

Песнь 3.

Ирмос: Веселится о Тебе церкви Твоя Христе зовущи, * Ты ми крепость Господи, * прибежище и утверждение.

Вод животворных, церкви источник отверзл еси, аще кто жаждет, усердно да приходит и пьет, вопия Блаже.

Вод животворных, церкви источник отверзл еси, аще кто жаждет, усердно да приходит и пьет, вопия Блаже.

От земли убо, на небо вознестися, проявление глаголаше, с небесе же Духа послати обетова Святого.

Иже естеством животворивый, иже от Девы родивыйся Господь, всем верным дарует безсмертие, яко Благоутробен.

И святого Минея на 4.

Кондак, Икос, и Седален святого Минея. Таже:

Слава, и ныне. Седален, глас 8-й.

Стоя посреди святилища, * преполовляющуся божествене празднику, * жагдай взываше, да грядет ко Мне и пьет, * пияи бо от сея Божественныя Моя воды, * реки из чрева источит повелении Моих. * Яко иже верует в Мя, посланнаго от Божественнаго Родителя, * со Мною прославится. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим.

Песнь 4.

Ирмос: Воздвижена Тя видевши церкви на кресте, * Солнца Праведного, * ста в чину Своем, * достойно взывающи, * слава силе Твоей Господи.

Растерзав смерти врата Своею силою, пути жизни сказал еси, и безсмертия двери отверзл еси, иже верую Тебе зовущим, слава силе Твоей Господи.

Преполовление всех и конец имея, и начало яко Безначален обдержа, стал еси посреди вопия, божественных, богомудрии, даров насладитесь.

Яко Бог всех держа власть, яко силен державу низложив смерти, послати обеща Христе Дух Святыи, иже от Отца происходящий.

Даеши богато благодать Тебе поющим, и иже из Тебе Рожьшагося Превечнаго Слова, Мати неискусомужная, и согрешением оставление, сим просящи Пречистая.

И святого Минея на 4.

Песнь 5.

Ирмос. Ты Господи ми свет, * в мир пришел еси, * во свет святых обраща, * из мрачна неведения, * верую хвалящих Тя.

Божественных праздник преполовление достигше, совершенное божественныя добродетели постигнути, потщимся богомудрии.

Божественных праздник преполовление достигше, совершенное божественныя добродетели постигнути, потщимся богомудрии.

Яко воистину священно, настоящее торжество, преполовление бо великих праздник, повелевает и светится обоюду.

Ум ангельский не может разумети Твое не изреченное из Девы, и пречистое Рождество, Спасе мой Всесилне.

И святого Минея на 4.

Песнь 6.

Ирмос. Пожру Ти со гласом хваления Господи, * церкви вопиет Ти, * от бесовския крове очищшися, * милостию от ребр истекшею Ти кровию.

Преполовление пятидесятницы наста днесь: отсюда божественная убо Пасха, святая светится, просвещающи божественнейшею светлостию, от онуду же Утешителевою благодатию осиявающи.

Преполовление пятидесятницы наста днесь: отсюда божественная убо Пасха, святая светится, просвещающи божественнейшею светлостию, от онуду же Утешителевою благодатию осиявающи.

Глаголаше в церкви Христе предстоя, иудейским собором Свою славу открывая, и предъявляя сродство к Родителю.

Буди ми Предстательница, и Стена нерушимая, от мирских мя соблазн избавляющи, едина Богородительнице, и божественным светолитием освещающи.

Троицен: Еди́но в Троице́ Божество, Существо́ триипостасное, несозданное, нераздельное вси славим, Отца, и Сына, и Святаго́ Духа, яко́ три суще́е, и еди́но.

Богородичен: Деву́ по рождестве́ поем Тя́, Деву́ и Матерь славим Тебе́ еди́ну, Чистая́ Богоневесто́ Отрокови́це, из Тебе́ бо воистинну́ Бог воплотися, обновив нас.

И святаго́ Минея на 4.

Кондак, глас 4-й.

Празднику́ законному́ преполовившуся, * всяческих Творец и Владыка, * к предстоящим глаголаше́ Христе́ Боже: * приидите и почерпите́ воду́ безсмертия. * Тем же́ Ти припадаем и верно́ вопи́ем, * щедроты́ Твоя́ даруй нам. * Ты́ бо еси́ источниќ животу́ нашему́.

Икос. Оляде́вшую ми́ душу́ согрешенми́ и беззаконии́, кропленъми́ Твоих кровей́ напой, и покажи́ плодоно́сну добродетельми́. Ты́ бо рече́ всем приходя́щим к Тебе́, слово́ Божие́ пречистое́, воду́ нетления́ почерпите́, живу́ же и очища́ющую грехи́, пою́щим славное́ и божественое́ Твое́ востание́, пода́я Благо́и иже́ с высоты́ соше́дшую воистину́ учеником Твоим Духа́ крепость, Тебе́ Бога́ ведя́щим, Ты́ бо еси́ источниќ животу́ нашему́.

Песнь 7.

Ирмос. В пе́щи Авраамския́ дети́ персьстей, * любови́ю благоверия́ паче́, * неже́ли пламенем опала́еми́ взы́ваху, * благословен еси́ в церкви́ славы́ Твое́й Госпо́ди.

Крепость́ Спасе́ смертную́ разорь́ силою́, стези́ жизни́ показал еси́ человеком, благодарно́ Тебе́ зову́щим, благословен еси́ в церкви́ славы́ Твое́й Госпо́ди.

Крепость́ Спасе́ смертную́ разорь́ силою́, стези́ жизни́ показал еси́ человеком, благодарно́ Тебе́ зову́щим, благословен еси́ в церкви́ славы́ Твое́й Госпо́ди.

Плоть но́сеща́ видя́ще, не разуме́ша собори́ еврейстии́ слова́ Тебе́ Божия́. Но мы́ Тебе́ воспе́ваем, благословен еси́ в церкви́ славы́ Твое́й Госпо́ди.

Вы́шняго́ освященно́ Божие́ селение́, радуйся́. Тобою́ бо да́деся́ радость́ Богороди́це, вопи́ющим Ти́, благословена́ Ты́ в женах, всенепоро́чная́ Влады́чице.

И святаго́ Минея на 4.

Песнь 8.

Ирмос. Ру́це распростер Даниил, * льво́ва зия́ния в ро́ве затче́: * огненную́ же́ силу́ угаси́ша, * добродетели́ю прено́ясавшеся́, * иже́ благочестия́ любите́лие́ отро́цы взы́вають, * благословите́ вся́ дела́ Господня́ Господа́.

Красен из гроба́ востав, Своєю́ Божества́ славою́ сия́я, апосто́лом Своим Госпо́ди́ явил еси́ Духа́ обеща́ние, тем посы́лая́ действо́, благословите́ вся́ дела́ Господня́ Господа́.

Умертвив ада яко Бог, Живоначальниче, всем источил еси живот вечный. Его же ныне воображают светлейше, светоносных дней сих, радостно вопиющим, благословите вся дела Господня Господа.

Яко солнце Христе правде явися, заря міру послал еси апостолы Своя, носяща Тебе света безсеменного, и неразумия мглу очищающа, вопиющим, благословите вся дела Господня Господа.

Се ныне оскуде яве, от иудина племene князь и вождь: Ты бо Всененорочная родила еси, прежде обещавшаго обетования, иже Христа Бога поющим, благословите вся дела Господня Господа.

И святаго Минея на 4.

И стихословим Честнейшую

Песнь 9.

Ирмос. Камень нерукосечныя горы, * от несекомыя Тя Девицы, * краеугольный отсечеса Христос, * и совокупив разстоящаяся естества: * тем веселящися, Тя Богородице величаем.

Новому и чистому житию, от Христа научившися, сие даже до конца сохранит, полезно вси потщимся, яко да Святаго Духа пришествие приимем.

В небесное паки житие звани бывши, ходатайственною силою, излиывшагося даже до рабья образа, и нас вознесшаю, Сего достойно величаем.

Ты мое смертное Живодавче, обложением безсмертия, и нетления благодатию оболк Спасе, воскресил сей, и Отцу привел сей, временную ми разрушив брань.

Яко корень источника, и вину нетления, Тебе Дево вси вернии уведевше, похвалами почитаем. Ты бо составное безсмертие источила еси.

И святаго Минея на 4.

Катавасия: Светися, светися ...,

Светилен.

Подобен: Небо звездами:

Жаждай взываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Сего ради вопием Ти, * слава Тебе Христе Боже, * яко богато изливал еси воды Твоего человеколюбия рабом Своим. [Дважды.]

Слава, и ныне: тойже

На хвалитех поставим стихи 4, и поем стихиру воскресну, глас 4-й:

Крест претерпевый и смерть, и воскресый из мертвых Всесильне Господи, славим Твое Воскресение. [Дважды.]

Овча есмь словеснаго Твоего стада, и к Тебе прибегаю Пастырю доброму, взыщи мене заблудшаго Боже, и помилуй мя.

Мученичен: Кто не ужасается зря святити мученицы, подвиг добрый, имже подвижастесь? Како в теле суще безплотнаго врага победиште, Христа исповедавшие, и крестом вооружившися. Темже достойно явитесь бесом прогонителие, и варваром победителие: непрестанно молитесь, спаситися душам нашим.

Слава, и ныне: глас 8-й:

Преполовившуся празднику Пасхи, в храм вшел еси святилищный Спасе наш, и став посреде народа, учил еси тех со дерзновением, и глаголал еси: Аз есмь свет мира, в след Мене идый не имать ходити во тме, но имети будет свет безсмертныя жизни.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 2-й:

Подобен: Доме Евфрафов:

Преклонь небеса, * спшел еси Спасе мой, * и плоть от Девы * кроме преложения приял еси, * источая мне оставление.

Стих: Бог же Царь наш прежде века:

Весь в Бозе Слове Ты еси, * погибающа мя хотя * изъяти от прегрешений, * соединяеши мне, * Человеколюбче.

Стих: Помяни сонм Твой, егоже стяжал еси исперва:

Ты пришел еси Царю, * премудросте великая, * Имже Отец * мир сотвори премудро, * со Святым Духом.

Слава, и ныне: глас 8-й:

Очистим помышлений сокровища, и душевная сияния просветим, и Жизнь узрим Христа, во святилище пришедша, премножеством благости, да врага победит, и спасет род наш, страстию Креста и Воскресения. К Нему же возопиим: непостижимо Господи, слава Тебе.

Таже, Благо есть исповедатися Господеви

Трисвятое. И по Отче наш:

Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

Таже ектения: Помилуй нас Боже: Час 1. И отпуст.

В ПОНЕДЕЛЬНИК 5-Й СЕДМИЦЫ ПО ПАСХЕ На Литургии

Блаженна от канона праздника, Песнь 7-й, 4-го гласа, на 6:

В печи Авраамския дети персьстей, любовию благоверия паче, нежели пламенем опаляеми взываху, благословен еси в церкви славы Твоей Господи. [Дважды.]

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи. [Дважды.]

Слава ..., **П**лоть носяща видяще, не разумеша собори еврейстии слова Тебе Божия. Но мы Тебе воспеваем, благословен еси в церкви славы Твоея Господи.

И ныне ..., **В**ышняго освященно Божие селение, радуйся. Тобою бо дадеся радость Богородице, вопиющим Ти, благословена Ты в женах, всенепорочная Владычице.

По входе тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

И храма Богородицы, и храма святого. Посем настоящего святого, аще есть. Таже кондак храма святого.

Слава, кондак самаряныни, глас 8-й:

Верою пришедшая на кладязь самаряныня, виде Тя премудрости воду, еюже напоившись обильно, царствие Вышее наследова вечно, яко приснославная.

И ныне: Кондак празднику, глас 4-й:

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду бессмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 30. [Деян. 12, 12–17.]

Во дни оны, смотрив Петр прииде в дом Мариин матери Иоанновы, нарицаемаго Марка, идеже бяху мнози собрани и молящеся. Толкнувшу же Петру во врата двора, приступи слышати отроковица, именем Роды: и познавши

глас Петров, от радости не отверзе врат: притекши же сказа Петра стояща пред враты. Они же к ней реша: беснуешися ли ся? Она же крепляшеся тако быти. Они же глаголаху: ангел его есть. Петр же пребываше толкий: отверзше же видеша его, и ужасошася. Помаав же им рукою молчати, сказа им, како Господь его изведе из темницы. Рече же: возвестите Иакову и братиям сия. И изшед иде во ино место.

Аллилуиа глас 1-й: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 32. [Ин. 8, 42–51.]

Рече Господь ко пришедшим к Нему иудеем: аще Бог Отец ваш бы был, любили бысте убо Мене: Аз бо от Бога издох и придох: не о Себе бо придох, но Той Мя посла: Почто беседы Моея не разумеете? Яко не можете слышати словесе Моего: Вы отца вашего диавола есте, и похоти отца вашего хотите творити. Он человекоубийца бе искони, и во истине не стоит, яко несть истины в нем. Егда глаголет лжу, от своих глаголет: яко ложь есть и отец лжи. Аз же зане истину глаголю, не веруете Мне. Кто от вас обличает Мя о гресе? Аще ли истину глаголю, почто вы не веруете Мне? Иже есть от Бога, глаголов Божиих послушает: сего ради вы не слушаете, яко от Бога несте. Отвещаша же иудее и реша Ему: не добре ли мы глаголем, яко самарянин еси Ты и беса имаши? Отвеща Иисус: Аз беса не имам, но чту Отца Моего, и вы не чтете Мене: Аз же не ищу славы Моея: есть Ища и Судя. Аминь, аминь глаголю вам: аще кто слово Мое соблюдет, смерти не имать видети во веки.

Вместо же Достойно, поем ирмос 9-й, глас 8-й:

Ирмос: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

Причастен: Ядый Мою Плоть, и пияй Мою Кровь, во Мне пребывает, и Аз в нем, рече Господь. Аллилуиа, [трижды.]